

獨  
漉  
堂  
詩  
集

獨漉堂集卷之四

羅浮陳恭尹字元孝

江村集

小序

甲寅之春亂起滇閩至丙辰而東西交徧及於惠肇予所居新塘東江之衝也二月挈家西還僦居羊額甫定而廣州變與東西連和丁巳夏廣州復通於北戊午春余移居龍江其秋而羅无妄之灾下於理者二百餘日己未春事始解四年之間虛名爲累日周旋刀鋒箭鏃中自有生以來未有危於斯者視丁亥之禍覆巢毀卵殆有甚焉庚申而

後乃稍得晏然復理詩書有同人唱酬之樂甲子  
始卜小禺山舍丙寅冬遂定居焉龍江羊額並屬  
江村故自丙寅以溯丙辰十年之詩爲江村集其  
間一燬於兵一竊於賊平生著作大半佚焉

新苗

高田易爲瘠下田易爲肥高田苗欲密下田苗欲稀春  
陽三二月陰雨來霏霏無論高與下青青同一時疎如  
鴈行列密若羊毛披清風颯然至蕩漾生漣漪迴旋合  
萬舞荏弱不自持遙遙極天碧望望深人懷先王制四  
民士首農次之非時尚不役矧乃鞭與笞一夫不播種

世有受其饑須知元元命繫此青青絲賤子爲老農敢  
以告有司

修禊後十日石濂禪師招同諸公雅集長壽禪林  
卽事賦

真妄非二途愚智各有適同此聞見中心目異喧寂西  
郊亦人境靜者得幽僻交錯引翠條蕭疎布林石春事  
滿高窓鳥聲在檐隙悠然古招提曠若新開闢嘉招及  
令序竟日隨飛錫論詩陋休遠析理兼元易旣喪我於  
吾焉知主爲客欲別聞清鐘溪山暮雲碧

送羅五湖

與君初一揖未語神先躍磁石受金針大小都不却船  
頭一尊酒頗盡新知樂秋風吹長棘半載成乖各匪伊  
動忍謀蒼天亦云虐惓惓君子心直可高雲薄君家在  
何所巴水明西郭才爲此身累不得耽丘壑游蹤徧西  
土美政流南國五馬今何之甘棠尙如昨無因一出送  
益我懷中惡男兒事蓬矢豈可辭苾屨同行得良友未  
足爲寂寞中州英賢地大雅應有作何時遺之音願附  
羅浮鶴

獄中送郭清霞兼寄李相如

輕風驅行雲中天日雷電霖潦在康衢積陰曠城縣良

朋當遠適冒雨來相見未言先慰藉恐我泣如霰拜送  
園土中握手情戀戀鳳鳥覽德輝高飛使人羨雌雉集  
山梁色舉何其善嗟哉雲中鵠今作泥巢燕江頭路幾  
許不獲銜杯餞況聞故人返萬里期言宴如何二紀別  
良晤乖一旦九州不盈掌日月雙丸轉流萍合有時鬢  
髮將無變因君謝故人努力千秋傳

獄中值林叔吾生日贈之

我生長於君爲日百五十何期來獄門初度亦相及來  
時秋未徂不覺春風入魚沫尙相濡蟲鳴已離蟄衰柳  
落復生燕雛去還集眷言南冠士不作岐途泣醉則相

和歌昏猶把書立吾道豈云非高天意難執匪兇率柙  
中皎駒孰維繫幸非修名累漸爾沈憂戢五岳路未遙  
故山芝可拾相期保百齡懷哉荷簞笠

古意

去家三十年昨夜夢歸里不見舊家門但見同鄉子雖  
非久言笑亦勝長羈旅誰云夢可續願奉千金市

贈任五陵

任君介然稀所可客邸杜門終日坐三年懷刺已生毛  
一日間關勞問我卷中先示禽言歌嬉笑之下痛哭多  
花下從君讀終日正名紀號皆不磨水走雲流無定質

不尙高華務平實五岳真形筆底看百家奇秘紛然失  
如君好事古有誰九州車轍安足奇穆王空有八駿馬  
豈謂書生能得之三閭大夫遠游者足跡未能遍中夏  
虛無闐闐叫不開枉用離騷繼風雅能游能賦兩足矜  
半生躡屩還擔簦計功而食不妄取神寒骨峻門如冰  
試與極言當世計達變通經還審勢如此人居草澤間  
蒼生豈得無凋弊與君交好二年來天轟地裂奔風雷  
相逢一度一鼓掌笑殺時無英傑才坐使神州淪劫灰  
念之不覺心魂哀守持廉節止自了天生我輩何爲哉  
寧爲夷吾小器匡天下莫作西山高蹈終蒿萊



送朱子蓉歸嘉興兼柬其兄子葆

七年之間三別子兩在山中一城市休論心跡未能并  
可惜頭顱只如此風塵拓落何所爲東溪片月當茅茨  
老兄能歌弟能和松花酒熟清堪攜北方苦旱南征伐  
無事區區一吳越高天且隕不自憂杞國狂夫空白髮

贈蕭壯行

朝來白髮梳千下一卷道書眠亦把誰是人間無累人  
君乃閒中最閒者芒鞋短袷坐新秋不冠不襪輕王侯  
城中館舍非不美歸心思濯淩溪流淩溪流水清如酒  
子善爲箕孫酌斗門前一步是風波身後千秋我何有

登大士巖紀事

小序

己未孟冬二十有八日己未賽神於大士巖有  
五色鳥數雙止于林端鳴聲清好此鳥唯羅浮  
有之志稱異人至山則五色鳥翔集記于辛丑  
歲同梁器圃麥叔夏入羅浮浹旬三見之正此  
月也去今十九年器圃已爲古人茲余復與叔  
夏同見靈物遠來豈有意耶漫作長句紀之是  
日同登者何中木姪天閣二子贛勵凡六人

寒來未試登山脚積雨初消好行樂大士巖前一揖餘  
四望風光殊不惡川原百里辨纖毫渚稻皆收野岸高

人家小梅日皦皦疎林赤葉風颼颼龍江水繞山根出  
諸峯秀美真無匹上懸峭壁下嵌巖森若文人多氣骨  
何來五色羅浮禽飛鳴下上好其音洞天福地不棲息  
得無有意來相尋朱明洞口華臺寺十九年前山裏事  
出山如送人山迎三人見者今餘二豈有他奇副昔聞  
巔毛種種日爭新臨高且共命尊酒不使仙禽笑妄人  
朱廉齋以張穆之畫冊索題爲作磨癢馬歌贈其

象郡之行

鐵橋老筆多生趣畫馬解作癢磨樹三足作力一足拳  
短鬣蕭蕭首回顧蘭筋不動尾絲垂竹耳雙高目光怒

吁嗟神物宜千里散放平皋獨何故戰士場中不一嘶  
瑤池可到誰爲御雖辭銜勒得天真未免蹉跎損高步  
古今萬物一馬也朱公索我爲長句頓覺風生尺幅間  
疎林葉脫天霜露海頭一州大如斗駿足驂驪豈堪駐  
何不負圖自出聖人前何不籥雲直上高天路世間豈  
無伯樂與王良爲君歌此畫馬章

集長壽禪林咏西番蓮花歌

西方佛有青蓮眼西番花有青蓮產朱絲作蔓碧玉莖  
繚繞疎籬意何限世間只尙紫與黃此花無色能久長  
百花香者爭高價此花不售自開謝唯有幽人最愜懷

竟日盤桓倚僧舍

送胡韶先歸南昌

惆悵爲此別寸心安可言如何相見來落落三十年長  
爲貧賤不足恨乾坤黥淡多烽烟君生十七去鄉井楚  
粵東西共萍梗闕下上書恒報罷軍中借箸無爲省碧  
血空傳先世名熱腸已化寒灰冷英雄失路欲誰投不  
妨胡越亦同舟世人安識徐元直指心不爲曹公謀獨  
將至性交良友間復沉酣托杯酒因事長流濟物恩活  
人每試回天手嶺南嶺北千里中人人皆道胡長公貧  
賤之交常滿座揮金如土囊時空浮生百年一倏忽快

意當前便須歇丈夫非愛七尺軀無人肯買千金骨草  
堂新構西山西東風三月花盈溪秫田得歲酒方熟童  
孫壯子行相攜天倫況復美羣從舊德日覺生光輝忠  
臣之後世必大浮雲於我何爲哉薜蘿帶芰荷衣淚滴  
先公墳下土三十三年游子歸

三月晦日同張默菴梁無悶藍公漪過賀秋卿於  
西竺禪房卽事

飛花欲盡羊城南乍晴乍雨天青藍青春尙餘此一日  
炎風忽暑殊難堪偶同故人步郊郭有客客寓城西菴  
門前對立木棉樹誰家繫馬驕驂驪高槐近窓窓紙綠

殿角風鈴細相觸枝間小鳥時一鳴對此翻疑在空谷  
問君何來來揚州輕帆破浪長江秋長星在天影落水  
芒寒氣黑魚龍憂北風其涼日苦短歇棹珠江應訓嬾  
圖書彙鼎共一牀促膝論交客常滿從來神駿不受羈  
去就之間何侃侃蓮花幕府謝珠盤落葉僧房對茶椀  
與君未識相知名及乎一見心膽傾中懷萬種安可盡  
揮杯笑視雙青萍君思買山時未可我既無山仍轉軻  
短歌長嘯各未終欲去不去風雷過翻盆之雨何其大  
君不見來時鞞履去乘輿丈夫未得長高臥

以端溪水巖小硯寄戴觀察怡濤系之以長歌

昔人只重端溪紫今之水巖勝于始始猶所採皮肉間  
山骨琢盡茲其髓一陽生後天益寒牂牁江落風林乾  
崖枯峽淺洞門出中有積水蛟龍蟠良工斤斧重泉下  
石室無光朝亦夜千枝列炬照人行萬指懸壺向江瀉  
金錢之費日不訾冬春之際能幾時瑕瑜況復不相掩  
非具大力安能爲崇禎之中熊開府邇者名藩亦時取  
後先疏鑿分東西文采精華並千古往時蕉白稱極佳  
今人指點尋青花以茲相石亦未盡必有生氣如雲霞  
拊不留手柔無骨墨質愈堅磨愈發宋坑宣德雖尙存  
粗則傷毫細則滑伯樂一顧冀馬空世間所患無追風



寄公一片雖小品由來亦自蛟龍宮  
茆齋久伴書生窮  
咿唔吟嘯不可終去茲卑陋依尊崇  
使君聲韻如鐘鏞  
揮毫落紙生蛻虹況今持憲出乘驄  
秋霜春露一言中  
非汝孰與成厥功嗚呼挽回造化良  
不易補天亦屬人能事五色之石將無是

積雨柬何玉其

積雨村邊路溪潮長石痕螭房環結屋  
龍目細垂園舊友仍羈寓  
新秋好晤言樓高雖可望各自閉柴門

題繡佛齋詩

馮司寇冠再來祖母旌表陳太夫人所著

遭逢雖不造文采獨堪誇  
姑婦成雙節詩篇屬大家苦

心追正始真調脫鉛華世業聞孫在芳蘭不妄芽  
玉潔因成色金堅遂有聲古人言不朽皆自性情生寡  
鶴夜中唳哀猿申旦鳴何須立文字聞者盡沾纓

送梁言公之惠州

豐湖清絕地亂後幾人行秋水明諸壑官橋帶兩城少  
年初旅食多藝盛時名佐幕前賢事良才斲始成

園居雜詩

有月鳴鶯早無風乳燕高倚檐花刺帽循竹露沾袍散  
誕從吾得驅馳與世勞曉涼開卷罷畊鑿語兒曹

野色浮千樹池光鑑一峯高標人外秀新綠雨邊濃此

地頗安堵他鄉時舉烽樓頭數杯酒佇立到昏鐘  
乾鵲來何處高巢占一椹可能知喜氣空自戀貧家就  
食糴爭母教飛翼礙花老夫圖穩臥未許報臆紗

獄中雜紀

鈴柝鳴終夜星河耿暮秋但令圭未玷休問杼曾投東  
海仍秦帝南冠號楚囚此身翔不下何處學輕鷗  
上室分東半疎籬別作房竈烟凝几研牕雨滴帷牀晝  
鼠游無憚宵蟲網不妨故人知更甚消息隔重牆  
把釣時臨水爲園少近郊本非羊慕蟻真有鹿懸庖多  
病尋方藥無才愧易爻古今同一夢元白不須嘲

圓扉今半月佳節報重陽粵俗人登墓秋風稼在場天  
遙唯見鴈地苦已飛霜書札詢兒輩溪花幾處黃

今年月食既疊向夏秋看晦魄冥無色虛輪側未安陰  
消如有象候滿欲何端三復修刑戒能無儆有官

南生期免戮葛相戒求聞一自違丹闕唯知戀白雲蟬  
無遮噪葉豹有害身文將老嬰縲絀深慙父母墳

柳底看棋出籬門步月開偶因閒得樂旋似寂生哀世  
豈祥凶物人應棄死灰如何文字債猶到獄中來

古塢標虞苑高城號尉佗青蠅猶宿昔黃屋久消磨午  
夢書能送秋吟酒易多死生聞有命緘口欲如何

已是傷心客那堪太息聲隔牆來斷續入耳怨分明世  
俗趨傾險神州尙甲兵何時瞻化日青草獄門生  
栩栩夢中蝶飛飛霜後螢半牀書共寢永夜月同醒覓  
紙題新句籠燈課舊經已忘身是繫只作戶長扃  
初度尋常度今茲倍愴神傷哉居穢地不敢禮先人亂  
日生何樂餘年死與鄰只愁來世事難定報恩身  
一旬雙諱日近接我生初淚滴重泉下身從九死餘爲  
禽填苦海作蠹飽塵書已比先人老千秋愧不如  
九月寒如此今年閏較催蕭條天外雨飛灑粵王臺風  
定聞新鴈人來說早梅江山寥落處登望幾時開

往昔居憂患皆爲進德門鄙人無意志一卷自朝昏渴  
得榼梨快寒加襪被溫近鄰賢首領間日送清尊

烽火兼舟楫艱危四十餘幾爲弓外鶴一葬海中魚債  
豈他生償名應獄吏書閒來尋舊將追問亂離初

一夜江城雨蕭蕭長鬢華入心鳴萬點爲潤想千家倍  
助天昏黑如兼客歎嗟鄉園歸未得催盡小梅花

三旬行萬里奏使舊能任驛路無淹騎秋風有報音遲  
留關厄數速免或他侵死地寰中滿爲憂豈獨今

神籤曾信手消息一陽初始日深愁遠而今慮且虛灰  
寒終應管雲暗可勞書天地心誰見乾坤莽自如

多慮憑天遣深寒到酒消掩書吟竟夜辭客臥終朝霜  
角思江檻風鈴隔麗譙向來臨眺地紅樹一蕭蕭

舉世悲先烈虛名萃眇身局天非一日畫地又何人不  
獻鄒陽作終知石父伸從來黃與綺秦漢未稱臣

身世猶如昨風威祇覺寒數爲百日滿序是一年殘北  
使歸何緩南音操已闌敝衣行卒歲省事且爲安

春前殤兩穉灾禍不云孤豈謂妻孥淚居然泣老夫往  
來詢動履肥瘦寄衣襦會有生還日張儀舌在無

一歲聿云暮萬方勞未還濟師江上戍轉粟雲中山身  
等齊民列名蠲力役班合將經月繫消折半生閒

昨日報春初今朝是小除舊枯泉脉潤新脫柳芽舒生  
態看星鬢憂端卜厯書家家勤祀竈兒女望何如  
已歇霏霏雨初迴習習風日車朝漸北斗柄夜方東大  
夢過前事長愁到老翁羈棲頻度歲只欠獄門中  
歲旦明朝是天書昨夜歸豈應違咫尺無處問恩威且  
學餽糟醉從嗔食覈肥八春開笑口不復有危機

賀何不偕新翁

與君皆老矣繼美在弓裘卽此天桃賦無非式穀謀百  
年寧復事五岳續爲游頗憶曹丕語成翁未白頭

走筆送袁士旦歸江南兼懷魏凝叔和公楊長蒼



積雨日未已客中懷可知如何相見地卽咏送行詩半  
月趙佗國三秋文獻祠好游年少事搔首鬢如絲  
一見卽投分相知寧在多吾尤推意氣人共誦詩歌卞  
璞終應剖南圭近已磨誰能記微賤爲報幸無他

送羅仲牧移家車陂

陂上家家好清溪帶綠筠近聞詩社裏添汝白頭人門  
向何峯住樽堪席地陳太平遺曲在爲我拂龍唇

別後寄方蒙章陶苦子兼柬何不偕梁藥亭吳山

帶黃葵村定郵詩之約

別時蟾兔缺不覺漸成圓旅夢猶高館生涯在釣船風

輕中酒後夜永一陽前爲有郵詩約寒燈頗廢眠  
曲江千載下作者未全湮筆墨無生氣光茫愧昔人誰  
能師日月可以喻清新大海波瀾在驪珠自不貧

楊敏叔六十

白雪鬚蒼在青山日月深貧能持定力老不負初心清  
磬夜當夢梅花寒出林一陽來復後甲子又從今

郊行

春郊一尊酒且以樂朝昏遠水澄珠寺遙峯閉石門鼓  
鷺鶯語地烽火杏紅邨短鬢絲將徧能銷幾處魂

閨中秋夜阻雨不得赴方蒙章之約枉詩見貽賦

此答之

人間無好月天上又中秋  
雨點微霑瓦簫聲漸閉樓  
遂違杯酒約空枉夜珠投  
旅宿蒹葭外伊人不易酬

後一夕同龐祖如方止止陶  
苦子龐毅子亮子羅

顯甫頤甫宿亦菴

尙滿中秋月微開昨夜雲  
古牆杉影落淨地佛燈分  
坐久鬚眉見天空語笑聞  
幾時還聞八重得對諸君

過弼唐感舊贈龐祖如

策杖秋方晚村橋日欲斜  
樹風喧萬葉山影靜千家  
瘡土安淳俗澄溪漾細沙  
擬尋龐氏隱還種邵侯瓜

他日誰青史當年易姓名  
門人思李固孤子寄程嬰  
我愧前賢事君猶古道行  
白頭懷宿昔竟夕自霑纓

初月

銀河誰下釣天道自張弓  
色借桑榆日涼生玉笛風  
山光開半面人影在牆東  
不俟居弦望清輝萬國同

送屈本菴入都

白首皇都客茲遊亦壯哉  
夏雲凝岱岳秋色在金臺  
萬里何窮路三閩未易才  
嶺頭無可戀應爲荔枝回

壽何克諫

洞口桃花落雨餘清溪流  
出引樵漁姓名不愧何徵士

甲子終虛宋永初七字題詩傳白社千峯採藥散比閭  
知君妙得還童訣元鬢朝來漸滿梳

歲暮送區魚山歸香山

長將筆舌代耕芸海島焉能絕世塵百里暫歸貧有母  
一年將盡老催人潮光似火船頭曉梅子如珠屋角春  
亂日相期無可祝早占熊夢慰慈親

壽雷峯天然禪師

孤高如月萬方看至道無言仰頌難垂老尙聞勤梵行  
太平先已薄儒官身爲碩果時方剝書滿名山墨未乾  
曾住朱明洞天上仙人不敢愛還丹

雨後馮再來中丞招同王長文姜坤侯何漣若陳  
繼袁諸子泛舟謁南海神祠登浴日亭望海是  
日晴霽誌朝復雨卽事賦謝

南人誰不頌芄苗百里行春路未遙鴈翅城開雲尚漬  
虎頭山出雨初消元戎小隊移輕舸大海微風入短簫  
天爲吾曹晴一日江花林月好相招

千秋吏部文章在  
三月中丞節鉞來  
廟壓平潮諸島沒  
天橫峯影海門開  
布衣未敢辭高宴  
赤舄無嫌踏野苔  
南國禹功元不到  
安流須仗濟川才

獄中柬黃畏齋楊巍材陳是菴

埋名不免墮園扉枉作山中老布衣尙有高人能命駕  
豈應吾道遂全非夏侯未死猶傳業叔夜如生亦采薇  
歲盡鄉園歸得否紫梅花落釣魚磯

邑中同人招飲西山草堂卽事

名園重得聚英豪暑月杯盤敢告勞  
匝水松陰鋪地潤出牆山色帶城高  
時光老去深知惜筆硯愁來漸懶操  
同是少年吟嘯地新霜看上鬢邊毛

獨漉堂集卷之四

羅浮陳恭尹字元孝

過六貞女墓

小序

順德龍津李氏處女也丙辰春粵東大亂有強  
暴謀脅致之六女懼不免夜以酒相酌一夕同  
赴水死比曉出之明妝儼然臂約紅羅兩兩相  
結其家合而葬之龜山之陰當事者立石表之  
曰六貞女墓

崑岡生玉總無瑕列女貞魂是一家一夕便成千古事  
孤墳空與後人嗟乘鸞合上三珠樹化雪應爲六出花



處子立名青史少曹娥江水在天涯

李蒼水司訓長樂以羅浮蝶繭數雙及繭布見寄  
云布卽蝶繭所成翼日蝶出繭中五色紛披翫  
對之間因成一律寄謝其意

仙遺衣化羅浮蝶蝶化山蠶復作衣栩栩未離莊叟夢  
絲絲還上玉人機質無綺麗宜於隱生有文章不愧飛  
多謝良朋遠相寄東方蟬蛻亦依希

夏至夜卽事

初晴天氣便炎蒸小閣風多最上層臘酒舊藏椎髻婦  
春茶新惠住山僧頻探落月移湘簟自惜流螢掩夜燈

一歲算來今夕短老夫猶爲幾回興

仲冬十三日贛兒受室率成一律示之

燈紅月皎兩相宜且放中懷入酒卮萬種未完爲子事  
百年過半作翁時山寒漸入青春色梅老偏高白雪枝  
莫道傳家無素業先公猶有一經遺

贛兒受室承諸公贈詩賦答

千秋名立一家捐心死灰寒四十年直爲詩書存此脉  
重勞塵土作諸緣義爰始叶包蒙吉韓奕多承續祖篇  
若使析薪譏可免釣竿吾在五湖船

送孔樵嵐宰樂昌

復掛征帆去此都勞勞終日在馳驅十旬三上二禺峽  
百里連分五嶺符南楚烽烟嗟往昔東風民物望來蘇  
關門鎖鑰須公等骨氣昂藏一丈夫

送何不偕

少年無遠不同遊比者輸君已數籌酒後獨尋燕市筑  
雪中曾買建陵舟九州未必容閒客五岳何常笑白頭  
我亦從茲理帆席大江明月記清秋

行路難

君不見天上之星墜爲石又不聞地中有雷生霹靂星  
有光芒猶可避雷無定所誰能測殺人豈必干與戈尺

地寸天皆局踏重城高寢自謂安中夜思之眠豈得何  
能變化爲螭螟飛入睫中人不知

翩翩之鴈來天隅中有一者飛而孤自喪其雄不並宿  
江中警夜甘爲奴江濱之人少慈惠一網高張百禽殫  
不虞永斷匹偶恩食肉賣毛爲得計

君不聞蜀山多陰稀見日羣犬吠之盈萬室又不聞野  
人有婦一目偏出見舉世皆不妍是非好惡何有定昨  
者高岸今爲淵勸君且自酣盃酒勸君不用狂開口正  
言自古有戈矛上士聞之皆卻走

君不見五陵年少插兩弓左射右射皆能工金丸如星

羽如月驕馬蹴踏鳴秋風林中走獸獵已盡仰面四顧  
蒼天空千年老鶴青田產昨日瑤池銜玉簡未迴勁翮  
排天門莫使霜毛刺人眼

卞和入山得璞玉獻之未售先別足秦王易以十五城  
趙國不與終受兵從來至寶物所忌錐刀之末今人爭  
小民止可求粗足朝飯糟糠暮飢粥輕裘肥馬不易誇  
有司視爾如仇家

隰有桑阪有漆朝朝斤斧無虛日社西老樹且千年於  
人無益已則全美材豈合終棄置用之貴得逢英賢昨  
者公家求大木匠石顧之蒙見錄已辭根柢落高雲却

伴沙泥委空谷

葡萄酒黃金卮玉簫瑤瑟聲參差佳人長袖爲君舞今  
時不飲將何須是與非得與失百年都是攢眉日劉伶  
一醉死便埋嗣宗多事猶詠懷畏首畏尾身餘幾智士  
畏名如畏鬼君不聞隋家白鶴自拔毛周廟犧雞啄其  
尾

孔雀之血能殺人翠鈿金尾光徹身古來賢聖不外飾  
蛙聲紫色能亂真一人獨坐深宮裏拜跪滿前皆有以  
誰懸明鏡照中心爲佞爲忠總相似仲尼一語君勿諛  
先觀其行後其言君子溫溫如白玉利口便便中有毒

其毒愈甚文愈高請君記取孔雀毛

落花一別樹安擇清波與污泥自古皆有死刀兵牀第  
無高低夢中得食醒難飽夷齊身餓名不朽流芳一日  
不易爲遺臭萬年安足道

獻大司馬制府吳公一百韻

北極盱長策南天眷重臣節移閩海近恩及嶺頭新睇  
望雲霓久霑濡雨露勻旌旂皆改色閭井自生春地潤  
衡廬接星分斗廟鄰滇流東注海橫浦北封秦舊俗民  
搖雜遺風鄒魯醇威行千里肅綱舉百城振文武趨蓮  
府溪山望畫輪詩須傳樂部德俟紀貞珉往日絃歌暇

清簋字句真飛騰珠不脛磊落筆如神世誦吟燈作官  
聞酌水貧孤標誠絕俗高義久驚人法重催科考時兼  
薦鍾臻後先羈舊尹三五及迷津相戒車前轍誰從井  
有仁賴公垂惻隱遂得免顰呻數萬金錢負多年簿責  
頻下車皆遣去重任畀於身湯網開窮鳥莊波借涸鱗  
卽云於物利未或以財徇俠氣過朱郭名流仰樂歎各  
期空冀野爭得望車輪銀燭連開宴瑤階九列儂攀留  
常累月酬唱動兼旬陽羨多栽茗江東自足尊四鰓魚  
入饌千日酒沾唇白雪操常凜芳蘭佩自紉驥才終必  
展龍屈理須信令譽通黃叟能聲徹紫宸九重恩破格



萬里檄征閩爰自神明宰高超岳牧倫六條持法慎九  
伐紀功純埃火飛猿峻妖氛紫帽屯逆萌生帶礪緩死  
冀宵晨徵士時緘劍搜財或算緡莫爲分玉石終見共  
胥淪不枉聞清論如絲拜御綸繡衣明解豸高印躍麒  
麟受節初開府兼官屬代巡澄清徐攬轡光霽儼垂紳  
一鼓更絃瑟先移曲突薪萬民歌樂只多土荷陶甄桃  
李三山徧韜鈴列校峻島人宵自遁荒土日加酌邊計  
奇難測雄功立不氓撓謙師大樹克讓協同寅憶昨杉  
關出將過粵海濬香花連水驛涕泣灑山榛父老追邪  
谷輿歌繼洧溱尚思崇俎豆豈憚走嶙峋嶺嶠人何幸

皇天若汝親矧當凋瘵後初過亂離長鄉落朝無火郊  
原夜有燐三毛名飯毳百結號衣鷄元氣公能補民心  
願莫因經時虛遠想一旦下高旻疾痛難更僕吁嗟自  
鬱氤頃從藩鎮始遂使利源湮凌雜供求取纖毫見怒  
嗔生民如草芥王度漸緇磷叢借還無日狐威假不馴  
驕矜行自絕骨肉且相信竟啟東南釁同歸樸滅均餘  
波仍汗染囹圄日囂斷孰市田文義誰從鄭俠陳脂膏  
原粵物鞭撲亦吾民世幸銷兵革恩宜用撫循輸將前  
不易賜潦近加辛卽盡敲民髓何裨秉國鈞官強須有  
術山海况多珍夷舶原交市遐方舊貢蠙有無通物產

聲教暨絃簧鹽鐵書何密耕屯計可掄兵民如復合風  
俗庶能淳夫子今豪傑文章古孟荀學能全體用巧不  
事組紉詩禮趨庭得風規昔駟遵先公開棨戟大節挺  
松筠善述真無忝仁聲美有洵會吹寒谷律終解捧心  
翬賤子何爲者其生亦已述在金慚躍冶於木更輪囷  
好著登山屐常冠折角巾行藏依草野出入遠城闔欵  
案看書臥頽顏攬鏡皴何知年冉冉祇愛石粼粼東漸  
曾過浙西行未到岷遙登太行上亦泛五湖濱處處聞  
風烈超超遠世塵溯洄心未已嚮往足猶踐行部千旌  
出防邊介士躡飛揚明鐵鎧鏗鎔響金罇並集三江鷁

初停六轡駟霜應生白簡風欲起青蘋北斗瞻今近南  
溟氣自申扶攜觀教化洗滌待咨詢幕府多英俊賢君  
愛笑嘖肯容狂狷士長揖列嘉賓

走筆送家紫馭孝廉

薄暮山歸力殊憊小童報子將于邁披衣急欲走送君  
東西城隔愁無奈君來幾日秋已窮黃花開殘多朔風  
摩天黃鵠卻垂翅鷹隼橫厲盤高空我聞志士有如弓  
在挽其屈愈深發彌遠看君才氣固落落世上何人在  
心眼明朝聞道理帆檣短歌相送不成章飛揚之望屬  
吾子僕不如人今老矣

客有白粵西來者以石遺吾家宗虞曰此某將軍所寶爲王祥臥冰石也同人多爲詩予歌以和之

吾家介弟饒花石有石陂陔不盈尺白章黃質理燦然  
彷彿中間有人跡身如轉側面右向左袂蒙茸覆衣上  
四周環匝白皚皚云是王祥臥冰狀冰間有物不可名  
是魚非魚如有情石於天地最頑鈍豈亦慕義師高行  
扁舟載石來千里人孰無親親有子感茲雪裏得嘉鱗  
各向高堂備甘旨愛君能養贈君家一時鄉曲爭相誇  
言似不似者各半將無畫足添於地吾聞李廣善射虎

草間有石射飲羽至誠所感金石開是虎非虎君試猜  
贈別王礎塵

昔年與子珠江別太白有亾宵八月今來送子五羊城  
土木雙星守不行徘徊往復似有戀母乃類我故人情  
昔年見子鬚如漆今來白髮參差出死生萬變十年中  
唯有兩心尚如一不肯低頭就一時不曾失足受磷緇  
只將熱酒澆懷抱下土聞而大笑之君不見天上之星  
密如雨亮天之工纔有五世間豪傑豈能多碌碌因人  
自終古

端州七星巖題名歌

媧皇未補星辰漏，神人驅石爲雲走。赭鞭鞭斷雲不前，  
天風吹落西江口。西江波濤千里來，雷霆霹靂蛟龍吼。  
洞府沉深絕照臨，奇象怪形多所有。少陽數七老陽九，  
艮止爲山折如斗。一開一闔相蔽虧，天樞天軸通關紐。  
質如白玉貞且堅，雨積蒼皮光不垢。絕無寸土可栽培，  
况有靈根作林藪。中虛或類鼙鼓鳴，下垂乃可金鐘扣。  
磴道遙盤霄漢閒，陰崖忽出他山後。扶嘯臺東千尺峽，  
下視諸峯若培塿。過鴈聲高每倒聞，行人路窄難迴肘。  
百曲湖光繞寺門，一片山城掛牕牖。尚憶曾游少壯時，  
今來不覺成衰醜。吳山越水多俊人，天涯此會誠非偶。

爲君小試燕然手與酣落筆無蝌蚪八分瘦硬高崖陡  
奮臂大書人某某石老天荒同不朽

甲子重陽後四日蔣莘田大叅招同潘亞目屈翁  
山登城北諸峯望全粵形勝還飲酒粵王臺上  
時有建復鎮海樓之議卽事賦呈

衡岳東走千萬峯南支五嶺爲其宗龍川瀕水在左右  
中有都會爲番禺海天清迥見萬里曠望可以開心胃  
重九已過秋爽至大夫車騎來雍容高峯表裏臨城北  
下視朝臺猶咫尺霸業升沉已幾迴文風極盛餘三百  
將軍猶紀廖與朱當日何公獻版圖樓名鎮海故有以



五層特立當城隅自從樓廢烽烟逼人事蕭條多瓦礫  
整頓欣逢子大夫九衢三陌生顏色卽今海宇無纖埃  
乾坤元氣須人培杖藜父老各翹首何時重見高崔嵬  
且當釀酒臨高臺松風謾謾帟幕開甘棠勿翦桃李栽  
先公作宰趨庭地白首乘驄使節來人生所貴有稱述  
羊公峴首今蒿萊令名直與天壤偕餘子碌碌安在哉  
後來不朽應吾儕爲君滿引手中杯

扶胥歌送王阮亭宮詹祭告南海事竣還都兼柬  
徐健菴彭羨門王黃潛朱竹垞諸公

扶胥之口水所歸青山浮出如無依長波際天不可極

白日夜半揚其暉東風吹上木棉樹片片盡作紅霞飛  
南海之神絳冕古瓊樓玉殿開朱扉前駕赤虬後文螭  
左驅天吳右馮夷虹蜺架道雨師灑蛟龍夾轂瞻旌麾  
九重秩禮來南紀誰持玉節漁洋子天上連宵動使星  
世間久矣傳詩史歸舟暫泊珠江南問奇訪古多所探  
都將十載相思夢并作江城半月談唐詩三變猶堪把  
明詩三變風斯下落落乾坤得數公盡掃榛蕪歸大雅  
羨門子竹垞生與君意氣遙相傾徐公淵博能下士黃  
潛慷慨多秦聲我抱區區君所察來時更枉羣公札山  
陽叔夜懶何堪吳下阿蒙目猶刮送君有作兼羣公鳳

鳳今已飛梧桐和鳴律呂賴公等且放野鶴閒雲中

何克諫八十

青蘿山中有茅屋土墻蟻徑幽人築春來屋內屋外花  
客坐前山後山竹盃頭良醞開數升架上素書閒一束  
落落乾坤覺汝賢籜冠蘿服望如仙正逢渭叟投竿日  
應見希夷大笑年

壽王大將軍孝揚

漢代諸侯誰第一仲華年少封高密晉家武庫杜當陽  
臨邊著述何洋洋將軍獨立千載下頡頏二子兼其長  
兩河作鎮始弱冠大江節鉞臨荆揚楚波西來不敢狂

吳人高枕憂可忘清歌徹夜調笙簧雄風被拂臺嶺傍  
島夷跪拜獻明珠旅檠馴象來梯航翠禽白雉籠千雙  
將軍所寶唯文章清齋萬軸函縹緗軍中多暇加丹黃  
時揮翰墨祖二王虎龍戲躍劍弩張階前爪士森兩行  
竦立汗下歎莫當一畫力敵千鈞強去年憶在三江口  
司馬舟中聯句久中央置研傍大斗一人賦詩二飲酒  
飛觴授簡迭奇偶秋菊新花映牕牖夜闌刻燭復數首  
清風白雪傳林藪如此驚才古希有况兼制行一無苟  
高堂色養有壽母雞鳴問寢垂紫綬鴈羽參差列前後  
甘棠樹老蘭英秀公家世德天所厚立功立言同不朽

以茲三爵爲公壽

寄贈卓火傳傳經堂歌

卓侯寄我一尺書細行小字千言餘開緘意氣溢毫楮  
烟雲繚繞生吾廬鳥翼欲搏南溟浪劍鋒直射牛斗墟  
不平之鳴有若此何況龍光鳳彩揚天衢伊昔休明代  
朝野交驩虞公卿折節下韋布草野高談皆廟謨天南  
地北未相見一字若得隨侯珠故家文獻今未墜君門  
累葉名通儒况聞忠烈有令祖月黑歸家夜騎虎燕山  
潛邸龍未飛一流南移真逆覩終知神器固天授不惜  
糜軀共殉主文皇兒戲視方黃獨謂先生言可取時殊

世易三百年兒孫尚守高曾矩堂開吳越號傳經四方  
投贈詩盈庭吾聞六經之傳有明晦時晦則晦明而明  
壁於秦火出於漢蝌蚪盡作絲竹聲至今大義如日星  
善傳善述必有以請君爲我側耳聽請君爲我側耳聽

夜雨有懷東張桐君兼寄董无休

醉來不覺和衣臥小樓未滅看書火夢回四壁走風濤  
空牀聽雨三更坐忽憶少時吟興狂君與董侯同過我  
席門蓬徑話終朝寶馬高車停道左董侯欲去君且留  
予時更鼓瀟湘舵落落風塵老漸來蕭蕭白髮生無那  
君才自足奮桑榆致身不肯游青瑣屈伸潛躍各有時

南北東西何不可董侯屢寄山陰書君來日剝離支只  
從前屈指幾烟雲吾輩幸存非坎坷君不見五羊城下  
陰雨中劉苑荒蕪趙臺墮

嘉魚

嘉魚潛石穴終歲氣常寒本欲承珠露寧知上玉盤有  
無通雅咏咫尺隔風湍未必名爲累隆冬澤易乾  
嘉魚吾舊識高價市人爭似鱗身微削如鯨鬣乍生細  
肪凝石乳兼味著霜橙未入宵來饌吟詩久不成

送王蒲衣采詩惠湖

樹樹熟離支殊非遠別時新蟬湘子廟初日海王祠路

記雙江合文猶八代衰時無採風使草野亦陳詩

送周德涵

便作天涯別重逢未可期快聞經世論兼讀過庭詩  
驥宜千里鷓鷯且一枝野人頭已白不復問當時

贈別黃忍菴太史

百年無作者之子擅奇才豈謂黔中使翻從嶺上迴  
衡文時望重握手老懷開更喜居停近深宵亦往來

東郭淹游跡南園接古祠乘車爲客日閉戶著書時  
怯醉開柳酒從酸剝荔支海隅多異物嵇陸未能詩

學到難窮地文能不愧名雖爲今太史猶似老諸生  
江



海心常下山林跡未并一時稱盛事千里聚同聲

時王阮亭

宮詹高讓園廷評並以使事至

整爲鄉井別十日惜分攜觀化俄生柳

千時病瘡

看書亦杖

藜心知龍節返路出海雲西會買扁舟送漁家水滿隄

病中承彭子安見過別後奉懷

度嶺年殊少軒車滿路光病中吾見汝秋後客何鄉伏

枕違清論開篇得妙方愈風文檄在繼述有諸郎

時見惠尊

人躬菴文集

送林敬臣

南鴈去不極北風聲正喧何堪衰草日還是送王孫再

世依畊鑿空山矢寤言與誰登冠石放眼望中原

病足舟中卽事

興劇思憑覽人扶上小舸客囊攜蕙苴鄉酒寄松毛少  
食肌時減多眠骨屢高可憐中夜夢躍馬尙能豪

送溫茂長

三秋違侍養萬里赴京華江路聞霜葉天門照雪花親  
存宜薄祿年少且辭家蕪絕金臺上看君步玉驂

送錢目天

度嶺三年客歸心四月天別離良未易鬚鬢况蒼然古  
筆追秦漢深杯得聖賢似君何不可高咏滿吳船

輓湯惕菴先生

大雅久云沒中原尙此人晨星方在望宿草已踰春便  
自成千載何繇贖百身唯餘召公樹蔽芾粵江濱

初春江行有感

人日吟詩坐客船白髭臨水一茫然西來山坼雲中峽  
北上江明雪後天幾處小帘春市酒誰家新月夜鳴絃  
郊原頗記從軍地草草東風又十年

過鍾莘野留贈

萬峯東走峽門青巖石蒼蒼見列星遊子偶來停短棹  
故人高臥有閒亭花明欄檻朝長倚月滿溪橋夜不扁

四十年前文酒會白頭相對記趨庭

寄周平山

介節清風最起予此心雖邈蹟常疎  
青春蓮府銜杯罷  
明月茆齋入夢初七國奇才多在客  
六朝名士總能書  
何因報我瑤華句一紙寒山慰索居

寄葉許山

荔枝曾自小園分荔子紅時倍憶君  
短髮細梳涼夜月  
虛窓高掩後山雲狂書往事追狐史  
夢寄閒身到鶴羣  
十載別來今大耄鱸湖觴酌更須勤

寄葉猶龍

江村集  
功先世在安邊少執金吾漢帝前寶帶尚存天府賜  
篋書猶是異人傳閒中歲月耽山水亂後文章託管絃  
長記黃塘好風景近來添得幾湖船

梁鵬若池中蓮開一花紅白各半索賦三首

半紅半白兩相加開向城西處士家何處更尋連理樹  
一枝全勝並頭花朗如弦月猶銜魄清比江雲欲變霞  
知道先生真訣得石牀相伴養丹砂

金行爲白火爲紅大冶元多鍛煉功朱粉並施鄰女美  
色香齊現法輪空高懷濯濯居人外巧笑盈盈立水中  
記得六朝王儉府一江南北互相雄

豈曰卑棲意自殊  
亭亭泥滓不曾污  
一莖擢出仙人掌  
二氣凝爲太極圖  
髮爲丹心常早白  
玉緣泣血半成朱  
雌雄好是芙蓉劍  
南斗光芒近有無

宋嶠菴招飲南園卽事賦別

客裏深勞命酒杯  
南園臘月正梅開  
城根倒影夕陽落  
橋下寒聲潮水來  
千里賓朋萍跡合  
百年懷抱鬢毛催  
滄江白社吟詩地  
送爾風流宋玉才

答張桐君

數月逡巡未報詩  
十年離索更何爲  
爲雄心老去成灰燼  
白雪吟多上鬢絲  
虞苑青蠅嗟往事  
陸生車馬記前時

只應共擷東籬菊買醉南園濁酒卮

至日同溫茂長姪汝侯雨中入高峽

寒雨從朝歇也無酒杯相命且狂呼長風直破西江浪  
短日多行百里途峽勢益奇霜旣落山容如赭草全枯  
年年此地猶爲客愧見峯頭石望夫

祝張二尹文宿

郭邊潮水日潺潺官舍無如少尹閒一卷新詩是公事  
夕陽支枕對西山

昌黎曾爲記藍田君較藍田一倍賢鉅竹老槐俱不有  
窓間松樹已千年

送周維念

西江秋水正湯湯暑氣初銷小閣涼歸客過逢初泊舫  
病身相送不離牀關山別路無杯酒書札京華少報章  
臥寫新詩不成字故人休訝懶嵇康

時以病不能報吳青壇朱竹垞諸公

書

送葉淵發

家門七葉金貂盛之子由來是冷人一偈安心居士法  
半年餐荔嶺南身秋江有酒鱸魚美碧落無雲鴈路新  
不向津頭望歸棹病來哀樂總傷神

贈別劉肩菴



相逢未得數追倍見說曾從絕國來鳳詔到時蠻女拜  
龍神祭日海雲開班生自有飛揚志漢武唯求跣跑才  
斯世昇平須俊傑看君非久滯蒿萊

獻祝大司馬制府吳公

清風此日滿南隅文武兼權是丈夫百粵諸侯趨使節  
八蠻君長拜兵符腰橫牛斗星邊氣句得驪龍領下珠  
浙水自來多俊傑幾回封爵屬通儒

海門曾報射長鯨身作東南萬里城彩筆不妨裁露布  
素絲隨處建干旌令如山岳軍皆肅心在冰壺政自清  
幸托樂郊何以賦家家絃誦答昇平

水清沙碧石粼粼千里舟車赴令晨  
檠戟葱籠高峽曙  
梅花消息定山春  
一陽復後天開子維岳生初歲在申  
會見作霖蘇九有先爲膏雨慰南人

送高謾園廷評

桂江猶帶劫餘灰  
主試淡煩作賦才  
麋鹿竹邊騎馬過  
鷓鴣聲裏放船迴  
逢人便問端溪石  
作客徒登趙尉臺  
不得留君到初夏  
枝頭紅荔正花開

送楊荆湖觀察內擢京卿

夾道笙歌萬姓喧  
俱來江上送高軒  
三年預試調羹手  
兩粵兼承化雨恩  
內詔卽今趨鳳闕  
名流何處望龍門

桃花院宇論文地峴首山前片石存

荆楊相接氣原通南北新花次第紅粵嶠尙懸卿士月  
楚帆先滿大王風濟時妙畧憂能遠傳世清篇老愈工  
此去明良慶相得賡歌遙在九天中

伏日同王礎塵張桐君朱子成周文康梁藥亭林

叔吾董克灌王紫巘集潘亞目視蒼樓分賦因

寄董无休

池連溪樹暑皆消酒得良朋興更遙片席領風來極浦  
斷虹將雨下青霄樓名趙尉高相望山有安期坐可招  
三十年前同賦客白頭書札到今朝

時克灌奉其尊人  
人无休書至